

## Morning Regional Dogri News Bulletin, 28<sup>th</sup> July 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

### Headlines

1. प्रधानमंत्री नरेन्द्र मोदी होर अज्ज आकाशवाणी उप्पर बडलै 11 बजे "मन की बात" प्रोग्राम व अपने बचार सांझे करगंन।
2. जम्मू कश्मीर सरकार दी प्शासनिक परिषद नै जम्मू कश्मीर च नियोजित विकास लेई लैंड पोलिंग ते जमीन दे विकास सरबंधी अधिकारें गी मुंतकिल करने आलील नीति गी मंजूरी देई दित्ती।
3. एम्स जम्मू अगले हफते थमां अस्पताल दे अंदर ओपीडी सेवा दी शुरूआत करी देग।
4. पैरिस ओलंपिक च भारतीय मर्दे दी हॉकी टीम नै न्यूजीलैंड गी 3-2 कन्नै हराई दित्ता। तोआई क्रिकेट च भारतीय टी नै पैहले टी-20 अंतर्राष्ट्रीय मैच च श्रीलंका गी 43 रंजें कन्नै हराइयै त्रकं मैचें दी श्रृंखला दी शानदार शुरूआत कीती।

<><><><><><>

### PM-Mann Ki Baat

प्रधानमंत्री नरेन्द्र मोदी होर कल बडलै 11 बजे आकाशवाणी थमां "मन की बात" कार्यक्रम राएं देस ते विदेश दे लोकें कन्नै अपने बचार सांझे करगंन। एह महावार इस रेडियो कार्यक्रम दी 112मीं किशत होग। एह श्री मोदी हुंदे लगातार त्रीह बारी प्रधानमंत्री बनने दे परैंत इस कार्यक्रम दी दूई किशत होग। एह कार्यक्रम आकाशवाणी, दूरदर्शन, एयर न्यूज़ वैंबसाईट ते न्यूज़ ऑन एयर दे सारे नेटवर्क उप्पर प्रसारत होग। इस कार्यक्र दा सिद्धा प्रसारण आकाशवाणी समाचार, डी.डी.न्यूज़, पीएमओ ते सूचना ते प्रसारण मंत्रालय दे यूट्यूब चैनलें उप्पर बी कीता जाग। आकाशवाणी इस कार्यक्रम दा प्रसारण हिंदी भाषा च होने दे तुरत परैंत क्षेत्रीय भाषाएं च बी करोग।

<><><><><><>

### Final PM

प्रधानमंत्री नरेन्द्र मोदी होरें नीति आयोग आस्सेआ चलाए जा'रदे विकास दी तांग आले अकांक्षी जिला प्रोग्राम दी सराहना कीती ऐ ते आखेआ ऐ जे इस कार्यक्रम दी कामयाबी दी बजट योग्य मापदंडें दी निरंतरता ते ऑनलाइन निगरानी ऐ, जेहदे नै बक्ख-बक्ख सरकारी योजनाएं च एहदे प्रदर्शन गी मता बेहतर बनाने लेई जिले मझाटै सेहतमंद मकाबलेबाजी होइ ऐ। श्री मोदी होर पानी दे साधनें-स्रोतें दे असरदार इस्तेमाल लेई राज्य स्तर पर दरेयाएं सरबंधी ग्रिड बनाने पर टकोहदा जोर दित्ता। जंदी संजा नीति आयोग दी गवर्निंग काउंसल दी 9मीं बैठक गी संबोधत करदे होई प्रधानमंत्री होरें आखेआ जे 2047 तगर भारत गी विकसित राष्ट्र बनाना हर इक भारतवासी दी महतवकांखा ऐ। उनें आखेआ जे राष्ट्री शिक्षा नीति, मुद्रा योजना, पी.एम. विश्वकर्मा, पी.एम.स्वनिधि ते अपराधिक न्यांह प्रणाली जनेह सुधारें दा इस्तेमाल भारती समाज ते अर्थबवस्था च बड्डी तब्दीलियां आहनने आस्तै कीता जाना चाहिदा।

<><><><><><>

### Land Pooling

जम्मू कश्मीर सरकार दी प्रशासनिक काउंसल नै प्रदेश च रियल एस्टेट सेक्टर गी बढ़ावा देने लेई बक्ख-बक्ख मालकें दिएं जमीनें गी सरकारी अजेंसी जां उंदे आस्सेआ आपूं बी किट्टा करने ते विकसित करियै किश मानदंडें दी बिनाह पर जिमीं मालकें गी वापस देने सरबंधी लैंड पूलिंग नीति ते जमीनें दे विकास अधिकारिणं मुंतकिल करने सरबंधी नीति गी मंजूरी दित्ती ऐ। उपराज्यपाल मनोज सिन्हा हुंदी प्रधानता तैहत् लाई गेदी प्रशासनिक काउंसल दी बैठका च लैंड पूलिंग पॉलिसी सरबंधी प्रस्ताह गी मंजूरी दित्ती गई जेहदे तैहत् सरकारी अजेंसियां जां प्राइवेट जमीनें दे मालक अपनी जमीनें गी किट्टा करियै विकास लेई ओहदा इस्तेमाल करगंन। नमीं नीति तैहत् जिमीं मालकें लेई जमीनें दा मुल्ल बधोग ते कन्नै मते बेहतर ढांचे खडरे जाई सकगंन। एह प्रस्तावित नीति 50 कमांह जां ओहदे शा मती जमीन लेई लागू होग। इक होर फैसले तैहत् प्रशासनिक काउंसल नै जमीनं दे विकास अधिकार मुंतकिल करने दी नीति बी मंजूर कीती ऐ जेहदे तैहत् कुसै जिमीं मालक आस्सेआ सार्वजनिक इस्तेमाल लेई सरैंडर कीती गेदी जमीन लेई टीडीआर सर्टिफिकेट दी शक्ली च गैर माली मुआवजा दित्ता जाग। टीडीआर नीति दा मकसद मास्टर प्लान सरबंधी प्रस्तावें दी अमलावरी च तेजी आहनना ऐ ते शुरूआती तौर पर इसी जेडीए ते एसडीए दे अधिकार क्षेत्र हेठ लागू कीता जाग।

<><><><><><>

## PM-Surya

प्रशासनिक काउंसल नै जम्मू कश्मीर च पी.एम.सूर्यघर मुफ्त बिजली योजना दी अमलावरी लेई प्रदेश दे बजट थमां बाढू सब्सिडी गी बी मंजूरी दित्ती ऐ। प्रशासनिक काउंसल आस्सेआ मंजूर कीती गेदी बाढू सब्सिडी मूजब 55 ज्हार रपें दी परियोजना लागत कन्नै 1 किलोवाट लेई सब्सिडी गी बधाइयै 36 ज्हार रपे करी दित्ता गेआ ऐ। इआं गै 1 लक्ख 10 ज्हार रपे दी परियोजना लागत कन्नै 2 किलोवाट लेई सब्सिडी गी बधाइयै 72 ज्हार रपे ते 1 लक्ख 59 ज्हार रपें दी परियोजना लागत कन्नै 3 किलोवाट लेई सब्सिडी गी बधाइयै 94 ज्हार 800 रपे करी दितता गेआ ऐ। ध्यानजोग ऐ जे प्रधानमंत्री नरेन्द्र मोदी होरें फरवरी 2024 च पी.एम.सूर्यघर: मुफ्त बिजली योजना शुरू कीती ह ते एहदा मकसद मुख्य भरे च 31 मार्च 2027 तगर 1 करोड़ परोआरें गी रियायती दरें पर घरें दिएं छत्तें पर सौर ऊर्जा प्लांट दी सहूलत उपलब्ध करोआना ऐ। एहदे राएं इनें परोआरें गी हर म्हीने 300 युनिट तगर दी बिजली मुफ्त उपलब्ध होग।

<><><><><><>

## Pak-Akhnoor

जम्मू च चनांह दरेया च छाल मारियै कथित तौर पर आत्महत्तेआ करने आले माहनु दी लोथ कल पाकिस्तानी अधिकारिणं भारत दे हवाले करी दित्ती। अखनूर सेक्टर दे इक बन्ने आले ग्रां दा बसनीक हर्ष नगोत्रा जंदी 11 जून गी लापता होई गेआ हा ते ओहदा मोटर सैकल चनांह दरेया दे कंडे बरामद होआ हा जेहदे परैंत ओहदे परोआरै पुलस च गुमशुदगी दी रिपोर्ट दर्ज करोआई। इस परोआर गी हर्ष दी मौत दी खबर इक पाकिस्तानी अधिकारी नै वट्स ऐप दे राएं दित्ती जेहदे परैंत परोआरै लोथ गी वापस भारत आहनने आस्तै अधिकारिणं कन्नै राबता कीता। फौज ते बीएसएफ दे अधिकारिणं इत्त सरबंधै च पाकिस्तानी अधिकारिणं कन्नै गल्लबात कीती। दौनें पक्खें आस्सेआ कनूनी औपचारिकताएं गी पूरा करी लैने परैंत कल संजा सुचेतगढ़ दे नेड़े Octroi Post पर पाकिस्तान नै हर्ष दी लोथ भारत दे हवाले करी दित्ती।

<><><><><><>

## LG-Condolence

उपराज्यपाल मनोज सिन्हा होरें कल अनंतनाग दे दकसुम शिड़क हादसे जेहदे च 8 लोकें जिंदे च 5 बच्चे शामिल हे, दे मारे जाने उप्पर गैहरा बसोस प्रगट कीता ऐ। हादसे दा शकार एह लोक किशतवाड़ थमां मारवाह आली बक्खी जा'रदे हे, जिसलै हुंदी गड्डी शिड़कै परा रूलकियै डूहंगी खड्डै च जाई पेई। अपने सौहगे सनेए च उपराज्यपाल होरें शिड़क हादसे उप्पर गैहरा बसोस प्रगट करदे होई जिला प्रशासन गी प्रभावत परोआरें गी हर लोड़चदी मदाद मुहैया कराने दे निर्देश जारी कीते।

<><><><><><>

## Amarnath Yatra

श्री अमरनाथ यात्रा लेई अज्ज बडलै 1 ज्हार 617 यात्रुएं दा जत्था भगवती नगर आले आधार शिविर जम्मू थमां कश्मीर घाटी लेइ रवाना होआ। 67 गड्डिं च सुआर इस काफले च 1 ज्हार 343 मर्द, 228 महिला, 2 न्याणे, 83 साधु ते 21 साध्वियां शामिल हियां। इंदे चा 408 श्रद्धालु बालटाल ते 1 ज्हार 269 पहलगाम आधार शिविर लेई बडलै मुंह न्हरे 3 बज्जियै 35 मिंटे उप्पर रवाना होए।

<><><><><><>

## AIIMS-Jammu(byte)

एम्स जम्मू आस्सेआ अस्पताल अंदर ओपीडी सेवाएं सनें होई केई निदान सेवां अगले हफते थमां शुरू कीतियां जा'रदियां न जिसलै के आईपीडी, विकल्पिक सर्जरिं ते होरनें सेवाएं गी मरहलेवार ढंगै नै शुरू कीता जाग। सांबा थमां आकाशवाणी संवाददाता सतपाल शर्मा मूजब एम्स जम्मू दे कार्यकारी डरैक्टर ते मुख् कार्यकारी अधिकारी डॉ. शक्ति कुमार गुप्ता होरें कल इक संवाददाता सम्मेलन च दस्सेआ जे एम्स च ओपीडी सेवाएं गी अगले हफते थमां शुरू कीता जा करदा ऐ। डॉ. गुप्ता होरें दस्सेआ जे ओपीडी दे बाद वैकल्पिक सर्जरिं ते होरने सेवाएं गी बी शुरू कीता जाग। डॉ. शक्ति गुप्ता होरें आखेआ.....बाईट

<><><><><><>

## Women Cricket

महिलाएं दे एशिया कप टी-20 क्रिकेट च अज्ज भारत दा मकाबला श्रीलंका कन्ने दम्बुला अंतर्राष्ट्रीय स्टेडियम च दपैहरी 3 बजे शुरू होग। तोआई श्रीलंका च कल शुरू होए दे टी-20 अंतर्राष्ट्रीय मकाबले च भारत नै अपने पैहले मैच च मेजबान टीम श्रीलंका गी 43 रंज कन्ने हराइ दित्ता। भारत नै पैहले बल्लेबाजी करदे होई 20 ओवरें च 7 विकेटां मुहाइयै 213 रंज बनाए, जेहदे परते च श्रीलंका दी टीम 170 रंज उप्पर गै सिमटी गई। इस श्रृंखला दा दुआ मैच ऐतवार संजा खेड्डेआ जाग।

<><><><><><>

## Weather

जम्मू च अज्ज बडलै थमां गै बरखा बरा'रदी ऐ, जेहदे करी लोकें गी गर्मी ते उमस थमां थ्होड़ी राहत थ्होई ऐ। मौसम विभाग मूजब कल जम्मू दा तापमान 35.1 डिग्री सैलिसयस ते तापमान च नमी 85 फीसद दर्ज कीती गई ही, जेहदे करी लोकें गी बड़ी मती गर्मी ते उमस दा सामना करना पेआ।

<><><><><><>

## J&K Bank

जम्मू कश्मीर बैंक नै 2024-25 आले माली ब'रे दी अप्रैल शा जून आली तिमाही च पिछले ब'रे दी इस तिमाही दे मकाबले शुद्ध लाह च 27 प्रतिशत दा बाद्धा दर्ज करदे होई 415 करोड़ रुपें दा मुनाफा हासल कीता ऐ। जम्मू कश्मीर बैंक नै पिछले ब'रे अप्रैल शा जून दी अवधि च 326 करोड़ रुपें दा शुद्ध लाह हासल कीता हा। बैंक नै इक ब्यान च आखेआ ऐ जे मजूदा माली ब'रे दी पैहली तिमाही च ओहदी कुल औंदन 3 ज्हार 188 करोड़ रेइ ऐ जेहड़ी पिछले ब'रे इस अवधि च 2 ज्हार 885 करोड़ रुपे ही।



## Olympic

पैरिस ओलंपिक दा पैह्ला ध्याडा भारतीय खडारिणं लेई उपलब्धिणं भरेआ रेआं महिलाएं दे 10 मीटर एयर राइफल मकाबले च मनु-भाकर होरें क्वालीफिकेशन मकाबले च त्रीय थाहर हासल करियै फाइनल लेई अपनी थाहर पक्की करी लेई ऐ। तोआई भारत दी मर्दे दी हॉकी टीम नै शुरुआती पूल-बी मैच च न्यूजीलैंड गी 3-2 कन्ने हराइयै अपना दबदबा बनाई दित्ता। भारत नै बैडमिंटन च अपना बेहतर प्रदर्शन कीता। चिराग शेटी ते सात्विक सिराज रनकी रेड्डी दी जोड़ी नै पैहले ग्रुप स्टेज मैच च फ्रांस दे लुकस लोरी ते रोन्न लबर दी जोड़ी गी हराई दितता। तोआई मर्दे दे सिंगल्स ग्रुप-एल मैच च दुनिया दे 18में नंबर दे खडारी लक्ष्य सेन नै 5 बारी ओलंपिक दे विजेतारेई चुके दे केविन कॉर्डन गी 21-8, 22-10 कन्ने हराई दित्ता।







